

Trefniadau ar gyfer Comisiynu Gwasanaethau – Cyngor Bwrdeistref Sirol Torfaen

Blwyddyn archwilio: 2023-24

Dyddiad cyhoeddi: Mehefin 2025

Cyfeirnod y ddogfen: 4921A2025

Paratowyd y ddogfen hon fel rhan o waith a gyflawnir yn unol â swyddogaethau statudol.

Os ceir cais am wybodaeth y gall y ddogfen hon fod yn berthnasol iddi, tynnir sylw at y Cod Ymarfer a gyhoeddwyd o dan adran 45 Deddf Rhyddid Gwybodaeth 2000. Mae cod adran 45 yn nodi'r arfer o ran trin ceisiadau a ddisgwylir gan awdurdodau cyhoeddus, gan gynnwys ymgynghori â thrydydd partïon perthnasol. Mewn perthynas â'r ddogfen hon, mae Archwilydd Cyffredinol Cymru ac Archwilio Cymru yn drydydd partïon perthnasol. Dylid anfon unrhyw ymholiadau ynglŷn â datgelu neu aildddefnyddio'r ddogfen hon at Archwilio Cymru yn swyddog.gwybodaeth@archwilio.cymru.

Rydym yn croesawu gohebiaeth a galwadau ffôn yn Gymraeg a Saesneg. Ni fydd gohebu yn Gymraeg yn arwain at oedi.

Mae'r ddogfen hon hefyd ar gael yn Saesneg.

Cynnwys

Adroddiad cryno

Pam y cynhaliom ni'r archwiliad hwn	4
Ein dyletswyddau archwilio	4
Ein hamcanion ar gyfer yr archwiliad hwn	4
Pam fod comisiynu'n bwysig	4
Yr hyn y gwnaethom fwrw golwg arno a sut y mae da'n edrych	5
Ein dulliau archwilio a phryd y cynhaliom ni'r archwiliad	5
Yr hyn a ganfuom	6
Ein hargymhellion i'r Cyngor	9
Atodiadau	
Atodiad 1 – cwestiynau a meini prawf archwilio	10

Adroddiad cryno

Pam y cynhaliom ni'r archwiliad hwn

Ein dyletswyddau archwilio

- 1 Rydym yn cynnal yr archwiliad hwn dan y dyletswyddau sydd wedi eu cynnwys yn:
 - adran 17 Deddf Archwilio Cyhoeddus (Cymru) 2004 (Deddf 2004) i helpu i alluogi'r Archwilydd Cyffredinol i fod wedi'i argyhoeddi (neu beidio) bod y Cyngor wedi sefydlu trefniadau priodol i sicrhau gwerth am arian o ran y modd y mae'n defnyddio ei adnoddau; ac
 - adran 15 Deddf Llesiant Cenedlaethau'r Dyfodol (Cymru) 2015 i helpu i alluogi'r Archwilydd Cyffredinol i asesu i ba raddau y mae'r Cyngor yn gweithredu yn unol â'r egwyddor datblygu cynaliadwy wrth gymryd camau i gyflawni ei amcanion llesiant.
- 2 Gall yr archwiliad hwn oleuo astudiaeth ar gyfer gwella gwerth am arian dan adran 41 Deddf 2004 hefyd.

Ein hamcanion ar gyfer yr archwiliad hwn

- 3 Ein hamcanion ar gyfer yr archwiliad hwn yw:
 - darparu sicrwydd bod gan gynghorau drefniadau priodol ar gyfer comisiynu gwasanaethau i sicrhau gwerth am arian o ran y modd y maent yn defnyddio adnoddau;
 - darparu sicrwydd bod cynghorau'n gweithredu yn unol â'r egwyddor datblygu cynaliadwy wrth gomisiynu gwasanaethau; ac
 - egluro sut y mae cynghorau'n mynd ati i gomisiynu gwasanaethau ac ysbrydoli a grymuso cynghorau a chyrff eraill yn y sector cyhoeddus trwy adnabod a rhannu enghreifftiau o arfer/dulliau nodedig lle y bo'n berthnasol.
- 4 Rydym yn cynnal yr archwiliad hwn ym mhob un o'r 22 o brif gynghorau yng Nghymru.

Pam fod comisiynu'n bwysig

- 5 Comisiynu yw'r broses a ddefnyddir gan y Cyngor i ddylunio gwasanaethau y mae'n bwriadu eu darparu. Mae'n dechrau â diffinio'r gwasanaeth a'r allbynnau a deilliannau a ddymunir ac yn diweddu pan fo'r Cyngor yn trefnu ei ddull darparu. Er enghraifft, trwy sefydlu tîm darparu yn fewnol, neu drwy gaffael cyflenwr allanol.
- 6 Gall trefniadau comisiynu helpu i sicrhau bod gwasanaethau'n cael eu darparu mewn modd darbodus, effeithlon ac effeithiol. I'r gwrthwyneb, gall gwendidau mewn trefniadau comisiynu leihaus effaith gwasanaethau a'u gwerth am arian, hyd yn oed os yw'r prosesau sy'n dilyn, megis caffael a rheoli contractau, yn gadarn.



Yr hyn y gwnaethom fwrw golwg arno a sut y mae da'n edrych¹

- 7 Fe wnaethom adolygu trefniadau'r Cyngor ar gyfer comisiynu gwasanaethau ac yn benodol i ba raddau y mae hyn wedi cael ei ddatblygu yn unol â'r egwyddor datblygu cynaliadwy; ac y bydd yn helpu i sicrhau gwerth am arian o ran y modd y defnyddir adnoddau'r Cyngor.
- 8 Nid oedd yr archwiliad hwn yn cynnwys trefniadau caffael na threfniadau rheoli contractau'r Cyngor.
- 9 Roedd yr archwiliad yn ceisio ateb y cwestiwn cyffredinol hwn: **Wrth gomisiynu gwasanaethau, a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?**
- 10 Fe ddefnyddiom ni'r meini prawf archwilio a nodir yn **Atodiad 1**, sydd hefyd yn dangos y berthynas rhwng y meini prawf a'r cwestiynau archwilio. Goleuwyd hyn gan ein gwybodaeth gronns yn ogystal â'r hierarchaeth gwestiynau a dangosyddion cadarnhaol yr ydym wedi'u datblygu i ategu ein harchwiliadau o gymhwyso'r Egwyddor Datblygu Cynaliadwy.



Ein dulliau archwilio a phryd y cynhaliom ni'r archwiliad

- 11 Mae ein canfyddiadau'n seiliedig ar adolygiadau o ddogfennau, a chyfweliadau gyda'r uwch swyddog(ion) sy'n gyfrifol am ddatblygu dull comisiynu strategol y Cyngor. Fe wnaethom hefyd gyfweld ag uwch swyddogion â chyfrifoldeb am wasanaethau y mae'r Cyngor wedi'u comisiynu'n allanol.
- 12 O ystyried yr ystod eang o wasanaethau sydd gan y Cyngor, fe wnaethom brofi sampl o'r trefniadau y mae'r Cyngor wedi'u sefydlu i gomisiynu gwasanaethau. I wneud hyn, fe ddewisom ni nifer o wasanaethau lle mae'r Cyngor wedi penderfynu comisiynu gwasanaethau'n allanol ac fe archwiliom ni'r trefniadau comisiynu y mae'r Cyngor wedi'u rhoi ar waith. Y sampl o feysydd gwasanaeth y gwnaethom eu hadolygu yn y Cyngor oedd:
 - Gwasanaeth Troseddau Ieuencid
 - Gwasanaethau hamdden
- 13 Mae'r dystiolaeth yr ydym wedi'i defnyddio i oleuo ein canfyddiadau'n gyfyngedig i'r ffynonellau hyn. Fe wnaethom y gwaith hwn ym mis Mawrth 2025.

¹ Fe'i diffinnir fel 'yr hyn a ddylai fod' yn ôl deddfau neu reoliadau, 'yr hyn a ddisgwylir' yn ôl arfer gorau, neu 'yr hyn a allai fod', pe bai'r amodau'n well.

- 14 Rydym yn gwneud y gwaith hwn ym mhob un o'r 22 o brif gynghorau yng Nghymru ac, yn ogystal ag adrodd yn lleol wrth bob cyngor, rydym hefyd yn bwriadu cynhyrchu adroddiad cenedlaethol.



Yr hyn a ganfuom

- 15 Ar y cyfan, canfuom **fod diffyg trefniadau comisiynu corfforaethol y Cyngor yn cyfyngu ar ei allu i gael sicrwydd ei fod yn sicrhau gwerth am arian**. Rydym yn nodi isod pam y daethom i'r casgliad hwn.
- 16 Nid oes gan y Cyngor ddull corfforaethol i gynorthwyo meysydd gwasanaeth i gomisiynu gwasanaethau. Mae bod heb drefniadau comisiynu corfforaethol yn cyfyngu ar sicrwydd y Cyngor bod yr holl feysydd gwasanaeth yn ystyried ffactorau allweddol i helpu'r Cyngor i gyflawni gwerth am arian yn gyson. Ar adeg ein gwaith maes, roedd Uwch Dîm Arwain y Cyngor wedi cymeradwyo fframwaith comisiynu'n ddiweddar, ond nid oedd hwn wedi cael ei brofi. Felly mae ein hadroddiad yn seiliedig ar y dystiolaeth a ganfuom ar yr adeg hon, gan gynnwys ein harchwiliad o'r ddau wasanaeth yr ydym yn eu nodi ym mharagraff 12 uchod.
- 17 Gan nad oes trefniadau comisiynu corfforaethol gan y Cyngor, nid yw'n sicrhau bod yr holl feysydd gwasanaeth yn diffinio'r gwasanaeth sydd i'w gomisiynu a'u bod felly'n ei ddeall yn llawn. Fodd bynnag, roedd y meysydd gwasanaeth a archwiliwyd gennym ni'n gallu diffinio diben y gwasanaethau a gomisiynwyd, y rhesymau drostynt a'u deilliannau bwriadedig. Mae deall yn glir pa wasanaethau sydd i'w comisiynu, beth yw'r angen am y gwasanaethau hyn a'r hyn y maent wedi'i fwriadu i'w gyflawni'n elfennau allweddol o drefniadau comisiynu er mwyn i wasanaethau sicrhau gwerth am arian.
- 18 Nid yw'r Cyngor yn ei gwneud yn ofynnol i feysydd gwasanaeth gynnal arfarniad cynhwysfawr o'r opsiynau cyn dewis mecanwaith darparu gwasanaeth. Fe wnaeth un o'r meysydd gwasanaeth a adolygwyd gennym ni ystyried ystod o opsiynau ar gyfer darparu'r gwasanaeth a'r risgiau cysylltiedig. Ond nid oedd y naill na'r llall o'r meysydd gwasanaeth wedi dogfennu ystyriaeth lawn i'r costau, y manteision na'r ffactorau cyfredol a hirdymor a all ddylanwadu ar bob opsiwn ar gyfer darparu'r gwasanaeth. Golyga hyn na all y Cyngor fod wedi'i sicrhau bod meysydd gwasanaeth wastad yn ystyried yr holl opsiynau i sicrhau'r gwerth gorau am arian. Mae hyn yn arbennig o bwysig ar adeg pan fo'r Cyngor yn profi heriau ariannol sylweddol, gan gynnwys bwlch cyllido rhagamcanol o £35.2 miliwn dros y pum mlynedd nesaf².
- 19 Nid yw'r Cyngor yn ei gwneud yn ofynnol i feysydd gwasanaeth ystyried y gorwelion cynllunio tymor hwy mwyaf priodol a tharo cydbwysedd rhwng anghenion tymor hwy ac anghenion byrdymor wrth gomisiynu gwasanaethau. Nid

² Archwilio Cymru, [Adolygiad o Gynaliadwyedd Ariannol Cyngor Torfaen](#), Gorffennaf 2024

oedd y Cyngor ond yn gallu darparu'r rhesymeg ar gyfer hyd contract un o'r ddau wasanaeth a archwiliwyd gennym. Golyga hyn efallai nad yw'r Cyngor yn mynd ati'n gyson i daro cydbwysedd rhwng anghenion byrdymor ac anghenion tymor hwy. O ganlyniad, ceir risg nad yw'n cyflawni gwerth am arian dros y tymor hwy.

- 20 Nid yw'r Cyngor wastad yn ystyried y goblygiadau ariannol llawn (costau oes gyfan) wrth gomisiynu gwasanaethau. Roedd un o'r meysydd gwasanaeth a adolygwyd gennym ni wedi ystyried costau oes gyfan y gwasanaeth a gomisiynwyd, ond dim ond y costau tymor byr a chanolig yr oedd yr ail faes gwasanaeth wedi'u hystyried. Gan nad yw'r Cyngor yn ei gwneud yn ofynnol i feysydd gwasanaeth ystyried goblygiadau llawn penderfyniadau comisiynu ar gyfer adnoddau ceir risg uwch na fydd yn deall maint y goblygiadau ariannol yn llawn ac y bydd yn dewis opsiwn na fydd yn rhoi'r gwerth gorau am arian.
- 21 Mae'r Cyngor yn rhan o Fwrdd Gwasanaethau Cyhoeddus Gwent sydd wedi mabwysiadu Egwyddorion Marmot³. Mae'r Cyngor wedi gwneud i'w amcanion llesiant gyd-fynd â'r egwyddorion hyn yn ogystal â'r nodau llesiant cenedlaethol. Dengys hyn ymrwymiad y Cyngor i gyflawni effeithiau ehangach wrth gyflawni ei amcanion llesiant. Fe wnaeth y ddau faes gwasanaeth a archwiliwyd gennym ni ystyried y cyfraniad y gall y gwasanaeth wedi'i gomisiynu ei wneud at amcanion llesiant y Cyngor yn ogystal â'r effaith ar flaenoriaethau cyrff cyhoeddus eraill a blaenoriaethau cenedlaethol. Fodd bynnag, oherwydd diffyg dull comisiynu corfforaethol, nid oes gofyniad i feysydd gwasanaeth wneud hynny. Mae hyn yn cynyddu'r risg nad yw'r Cyngor wastad yn ystyried sut y gall penderfyniadau comisiynu roi cymorth i gyflawni amcanion ehangach. Mae ystyried goblygiadau ehangach penderfyniadau comisiynu hefyd yn gallu helpu'r Cyngor i osgoi dyblygu ac adnabod manteision lluosog sy'n sicrhau deilliannau gwell a mwy o werth am arian.
- 22 Nid yw'r Cyngor yn ei gwneud yn ofynnol i feysydd gwasanaeth adnabod yr ystod lawn o randdeiliaid sydd â buddiant yn y gwasanaeth a gomisiynir, a'u cynnwys wrth lunio'r modd y darperir ei wasanaethau. Er enghraifft, dim ond un o'r gwasanaethau a archwiliwyd gennym ni allai ddangos eu bod wedi ystyried barn defnyddwyr gwasanaethau a rhanddeiliaid i lunio'r gwasanaeth. Nid oedd y naill wasanaeth na'r llall wedi cwblhau Asesiad Effaith Integredig i ystyried sut y gallai newid i'r modd y darperir y gwasanaeth effeithio ar yr holl randdeiliaid. Gall gweithio gyda'r bobl a'r partneriaid iawn helpu'r Cyngor i sicrhau ei fod yn comisiynu gwasanaethau sy'n diwallu anghenion ei gymunedau, ei fod yn adnabod cyfleoedd ar gyfer cydweithio rhwng sefydliadau ac yn darparu gwasanaethau mewn ffordd sy'n cynyddu gwerth am arian i'r eithaf.
- 23 Nid yw trefniadau'r Cyngor yn sicrhau ei fod yn mynd ati'n systematig i ystyried yr holl gyfleoedd ar gyfer cydweithio wrth gomisiynu gwasanaethau. Trwy beidio ag ystyried yr holl gyfleoedd i weithio gyda phartneriaid presennol neu bartneriaid posibl wrth wneud penderfyniadau comisiynu, ceir risg bod y Cyngor yn colli

³ Rhanbarth Marmot Gwent – Bwrdd Gwasanaethau Cyhoeddus Gwent

cyfleoedd i wella gwerth am arian trwy, er enghraifft, rannu adnoddau ac arbenigedd neu gapasiti comisiynu.

- 24 Nid oes gan y Cyngor drefniadau i sicrhau bod yr holl feysydd gwasanaeth yn nodi sut y bydd gwerth am arian gwasanaethau a gomisiynir yn cael ei asesu a'i fonitro. Mae gan y ddau faes gwasanaeth a archwiliwyd gennym ni drefniadau ar gyfer eu gwasanaethau wedi'u comisiynu i fonitro'r modd y cyflawnir deilliannau bwriadedig ac felly gwerth am arian. Ceir mesurau perfformiad a deilliannau ynghyd â threfniadau monitro contractau eglur. Fodd bynnag, nid yw'r Cyngor yn gyson yn ei gwneud yn ofynnol i feysydd gwasanaeth nodi trefniadau i asesu a monitro gwerth am arian gwasanaethau wedi'u comisiynu. Felly, ceir risg nad oes gan y Cyngor wastad sicrwydd ei fod yn sicrhau gwerth am arian.
- 25 Gan nad oes gan y Cyngor drefniadau comisiynu corfforaethol ar hyn o bryd, nid yw'n gallu adolygu ei ddull. Hefyd, nid oes gan y Cyngor drefniadau ffurfiol i sicrhau bod gwersi a ddysgwyd o weithgarwch comisiynu'n cael eu hadnabod a'u rhannu ar draws y sefydliad fel rhan o'r drefn arferol. Mae mynd ati'n rheolaidd i adolygu effeithiolrwydd trefniadau i gomisiynu gwasanaethau a rhannu gwersi a ddysgwyd yn bwysig i helpu i adnabod meysydd ar gyfer gwella, ac i helpu i sicrhau gwerth am arian.

Ein hargymhellion i'r Cyngor

Arddangosyn 1: ein hargymhellion i'r Cyngor

Argymhellion

A1 Cyflwyno dull corfforaethol o gomisiynu gwasanaethau

Er mwyn galluogi'r Cyngor i asesu gwerth am arian gwasanaethau wedi'u comisiynu, dylai roi dull comisiynu ar waith ar draws y Cyngor. Dylai hwn sicrhau ei fod:

- 1.1 yn rhoi diffiniad eglur o'r gwasanaeth y mae'n ystyried ei gomisiynu a'r rhesymau dros wneud hynny (**paragraff 17**);
- 1.2 yn cynnal arfarniadau cynhwysfawr o'r opsiynau wrth gomisiynu gwasanaethau sy'n cynnwys costau llawn pob opsiwn, ei risgiau, ei fanteision a'r ffactorau cyfredol a hirdymor a allai effeithio ar ddarparu (**paragraff 18**);
- 1.3 yn cynllunio dros ffrâm amser briodol (**paragraff 19**);
- 1.4 yn deall y goblygiadau hirdymor ar gyfer adnoddau (**paragraff 20**);
- 1.5 yn ystyried yr effeithiau ehangach, gan gynnwys cyfleoedd i gyflawni manteision lluosog a lleihau dyblygu (**paragraff 21**);
- 1.6 yn ystyried barn y rhai y byddai'r gwasanaeth a gomisiynir yn effeithio arnynt (**paragraff 22**);
- 1.7 yn rhoi ystyriaeth briodol i gyfleoedd posibl ar gyfer cydweithio (**paragraff 23**); ac
- 1.8 yn nodi sut y bydd gwerth am arian gwasanaethau a gomisiynir yn cael ei asesu a'i fonitro (**paragraff 24**).

A2 Cydymffurfio â'i drefniadau comisiynu

Unwaith y bydd y Cyngor wedi rhoi ei ddull comisiynu ar waith, dylai sicrhau y cydymffurfir ag ef ar draws y sefydliad.

A3 Adolygu trefniadau comisiynu'r Cyngor

Unwaith y bydd y Cyngor wedi rhoi ei ddull comisiynu ar waith, dylai wneud y canlynol

- 3.1 gwerthuso effeithiolrwydd ei drefniadau comisiynu'n rheolaidd (**paragraff 25**); a
- 3.2 rhannu gwersi o'i weithgarwch comisiynu ar draws y Cyngor (**paragraff 25**).

Atodiad 1

Cwestiynau a meini prawf archwilio

Cwestiwn cyffredinol: Wrth gomisiynu gwasanaethau a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?

Cwestiynau Lefel 2	Cwestiynau Lefel 3	Meini Prawf
A oes gan y Cyngor resymeg eglur dros gomisiynu gwasanaethau?	A yw'r Cyngor yn diffinio'n glir pa wasanaethau y mae'n bwriadu eu comisiynu a pham?	• Mae'r Cyngor yn nodi diffiniad clir o'r gwasanaethau y mae'n bwriadu eu comisiynu. • Mae'r Cyngor yn nodi 'pam' fod arno angen comisiynu'r gwasanaethau gan gynnwys: – effaith/deilliannau bwriadedig darparu'r gwasanaeth; ac – a fydd/sut y bydd y gwasanaeth yn helpu'r Cyngor i gyflawni ei ddyletswyddau statudol.
	A yw'r Cyngor yn cynnal arfarniad cynhwysfawr o'r opsiynau comisiynu cyn penderfynu comisiynu gwasanaeth?	• Mae'r Cyngor yn ystyried yr ystod lawn o opsiynau comisiynu ar gyfer darparu'r gwasanaeth – gallai'r opsiynau gynnwys y canlynol, er enghraifft: – darpariaeth fewnol; – trefniadau partneriaeth neu ddulliau o gomisiynu o fewn ac ar draws sectorau; – allanoli'r gwasanaeth i ddarparwr arall trwy ymddiriedolaeth neu drefniant arall; a hefyd – contractio'r gwasanaeth trwy broses dendro. • Mae'r Cyngor yn ystyried costau a manteision yr opsiynau o safbwynt darbodaeth, effeithlonrwydd ac effeithiolrwydd – gan gynnwys dros y tymor byr, canolig a hir. • Mae'r Cyngor yn cynnwys costau rheoli contract o fewn ei asesiad o opsiynau comisiynu. • Mae'r Cyngor yn cynnwys asesiad o risg ar gyfer pob opsiwn comisiynu fel rhan o asesu costau a manteision. • Mae'r Cyngor yn defnyddio amrywiaeth eang o wybodaeth o ffynonellau mewnol ac allanol i ddatblygu dealltwriaeth am y ffactorau cyfredol a hirdymor sy'n debygol o effeithio ar wasanaethau a gomisiynir.

A yw'r Cyngor yn cynllunio dros raddfa amser briodol?	A yw'r Cyngor yn ystyried beth mae hirdymor yn ei olygu wrth gomisiynu gwasanaethau?	• Mae'r Cyngor yn ystyried beth mae hirdymor yn ei olygu wrth gynllunio ei ddull o gomisiynu gwasanaethau – h.y. pa mor bell ymlaen all/ddylai gynllunio a pham. • Mae'r Cyngor yn ystyried sut y bydd yn taro cydbwysedd rhwng anghenion byrdymor a hirdymor wrth gynllunio ar gyfer comisiynu gwasanaethau gan gynnwys, er enghraifft, wrth bennu'r ffrâm amser ar gyfer contractau neu drefniadau comisiynu eraill.
	A yw'r Cyngor yn deall y goblygiadau hirdymor o ran adnoddau wrth gomisiynu gwasanaethau?	• Mae'r Cyngor yn meddwl am yr adnoddau y bydd eu hangen arno dros y tymor canolig a hwy (costau oes gyfan) i ddarparu gwasanaethau a gomisiynir. • Mae'r Cyngor yn ystyried sut y gellid gweithredu ystod o senarios lleihau cyllideb yn y dyfodol mewn perthynas â gwasanaethau a gomisiynir.
	A yw'r Cyngor yn nodi sut y bydd yn monitro gwerth am arian gwasanaethau a gomisiynir dros y tymor byr, canolig a hir?	• Mae'r Cyngor yn nodi'r trefniadau monitro y bydd yn eu dilyn ar gyfer y gwasanaeth a gomisiynir. • Dylai'r Cyngor ddisgrifio sut y bydd gwerth am arian gwasanaethau a gomisiynir yn cael ei asesu a'i fonitro gan gynnwys: – costau a manteision; a hefyd – cynnydd tuag at gerrig milltir a mesurau tymor byr, canolig a hwy.
A yw'r Cyngor wedi meddwl am yr effeithiau ehangach y gallai ei wasanaeth a gomisiynir eu cael?	Wrth gomisiynu gwasanaethau, a yw'r Cyngor yn ystyried sut y gall gynyddu eu cyfraniad at amcanion llesiant y Cyngor i'r eithaf?	• Mae'r Cyngor yn ystyried sut y bydd gwasanaethau a gomisiynir yn effeithio ar ei holl amcanion llesiant ei hun i sicrhau manteision lluosog, osgoi dyblygu neu unrhyw ganlyniadau anfwriadol, e.e. ystyried amcanion tymor hwy, y gadwyn gyflenwi leol, cydnerthedd y farchnad ac effaith hyd contractau, bioamrywiaeth, a lleihau carbon.
	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at amcanion llesiant cyrff eraill yn y sector cyhoeddus i'r eithaf?	• Mae'r Cyngor yn ystyried sut y bydd gwasanaethau a gomisiynir yn effeithio ar amcanion llesiant cyrff eraill yn y sector cyhoeddus i sicrhau manteision lluosog ac osgoi dyblygu neu unrhyw ganlyniadau anfwriadol.
	Wrth gomisiynu gwasanaethau, a yw'r Cyngor	• Mae'r Cyngor yn ystyried sut y bydd gwasanaethau a gomisiynir yn effeithio

	yn ystyried sut y gall gwasanaethau gynyddu eu cyfraniad at y Nodau Llesiant Cenedlaethol i'r eithaf?	ar y nodau llesiant cenedlaethol i sicrhau manteision lluosog ac osgoi dyblygu neu unrhyw ganlyniadau anfwriadol.
A yw'r Cyngor yn gweithio gyda'r bobl a'r partneriaid iawn i ddylunio a darparu ei wasanaethau a gomisiynir?	A yw'r Cyngor wedi adnabod pwy y mae angen iddo eu cynnwys?	Mae'r Cyngor yn deall pwy fydd gwasanaethau a gomisiynir yn effeithio'n uniongyrchol ac yn anuniongyrchol arnynt. Goleuwyd hyn gan ddadansoddiad rhanddeiliaid neu ymarfer tebyg.
	A yw'r Cyngor yn cynnwys yr amrywiaeth lawn o bobl?	- Mae'r Cyngor yn cynnwys yr amrywiaeth lawn o safbwyntiau wrth benderfynu sut i gomisiynu gwasanaethau. - Mae'r Cyngor yn defnyddio canlyniadau gweithgarwch cynnwys i oleuo sut y bydd yn comisiynu gwasanaethau, gan gynnwys ei effaith ar grwpiau sy'n rhannu nodweddion gwarchodedig.
	A yw'r Cyngor yn cydweithio gyda'r partneriaid cywir?	- Mae'r Cyngor yn deall yn dda pa bartneriaid a pha bartneriaid posibl y gallai weithio gyda hwy i gomisiynu gwasanaethau i wella gwerth am arian. Goleuwyd hyn gan ddadansoddiad cynhwysfawr o bartneriaid posibl a'u blaenoriaethau. - Lle mae cyfleoedd i wella gwerth am arian trwy gomisiynu gwasanaethau mewn partneriaeth yn cael eu hadnabod, mae'r Cyngor yn mynd ar eu trywydd.
A oes gan y Cyngor drefniadau i werthuso gwerth am arian ei ddull comisiynu?	A yw'r Cyngor yn mynd ati fel rhan o'r drefn arferol i werthuso effeithiolrwydd ei drefniadau comisiynu?	- Mae'r Cyngor yn adolygu effeithiolrwydd ei ddull comisiynu'n rheolaidd gan gynnwys: - i ba raddau y mae gwasanaethau a gomisiynir yn cyflawni'r amcanion y mae'r Cyngor wedi'u pennu; a - gwerth am arian modelau comisiynu a ddewiswyd gan gynnwys ystyried mewnbynnau, allbynnau a deilliannau.
	A yw'r Cyngor yn mynd ati fel rhan o'r drefn arferol i rannu unrhyw wersi a ddysgwyd i oleuo ymarferion comisiynu yn y dyfodol?	Mae'r Cyngor yn rhannu ac yn cymhwyso unrhyw wersi a ddysgwyd o'i ddull comisiynu yn eang ar draws y sefydliad, a chyda phartneriaid lle y bo'n berthnasol.



Archwilio Cymru

1 Cwr y Ddinas

Caerdydd CF10 4BZ

Ffôn: 029 2032 0500

Ffacs: 029 2032 0600

Ffôn testun: 029 2032 0660

E-bost: post@archwilio.cymru

Gwefan: www.archwilio.cymru

We welcome correspondence and telephone calls in Welsh and English.
Rydym yn croesawu gohebiaeth a galwadau ffôn yn Gymraeg a Saesneg.